

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1708 del 20/06/2025

A naiekait as keart en de politik ver za schutzn de sprochenminderhaitn

ORF 1 ont ORF Sport klor asn gònze trentinische lòn

[Mòcheno] Sait en pfinsta af de 19 van prochet 2025, men mu sechen klor ORF 1 ont ORF Sport asn gònze Trentinische lòn. Finz vour a por bochen ist moglech gaben za sechen de osterraiche ORF lai en a toal platz van Trentin, ont iaz, gèltsgott en an projekt as geat um en de politik va schutz ont bèrt gem van sprochenminderhaitn va de Autonome Provinz va Trea't, ist versichert en òlla de lait za meing sechen der kanal en taitscha sproch. S baitergem van sender gip de moglechkait za prauchen guat ont flusseg de òllgamo' osterraich sendung, abia gruntnaiekait ver za versichern en de gamo'schòftn va taitsch sprochenminderhait (bersntoler ont zimber) de audiovisuellen nochrichn en taitsch.

De programm va ORF gea' za baitern de nochrichtdinstn as schoa' sai', asou za verraichern sa ont vermearern sa. S ist an vourtschbinn as derzua en de innhòltn van lokaln telebisionnetzn gea', as iber en temen as guat prauchen kemmen ver en Trentin klòffen, ont as untermittelt kemmen van Dinst ver de Sprochenminderhaitn ont ausbendegen netzn, avai s ist an dinst va òllgamo' birtschòftlege enteress. De naiekait gip an paitrog ver za kennen de taitsch sproch, de osterraiche gamo'schòft ont sai'na besonderhaitn.

En moment gilet a konvenzion zbischn Region, GECT ont ORF ver za gem aus avn regionallòn, turch en Ras (Radiotelevisione Azienda Speciale) as hòt za tea' pet en ausgem en gònze Euregio nochrichn ont telebisiondokumentarn gamòcht va ORF (Osterraiches radiotelevision Innricht) as hom za tea' pet en Trentin. Zbischn de riven van GECT men untermittelt de nochricht ont s baitern de eirter bou as men sicht, s pesser sechen ont mear nochrichn ont televisionprogramm as men mu' pet de media - iberhaup pet emitettn va ourt as òrbetn en de eirter ont emitettn va òllgamo'rècht - ver za lòn mear kennen de sprochen, de kultur ont de ausònderkaitn s verpunft va de birtschòft ont va de gamo'schòft en gònz lòn van Euregio.

Finz iaz de konvenzion hòt nounèt gamu' enviregea' ont de programm hom gamecht sai' tsechen lai en a stuck van provinzal lòn.

Gèltsgott en de mittòrbet pet Trentino Digitale, de provinzalamministrazion hòt se oa'ne galeik ver za lòn mear sechen (5 Mbit/s en gòzn) ver za versichern s pesser ont schea'ner sechen ont lòn sechen en gònz provinzallòn der dinst, s ist drinn gor Palai en Bersntol (kan Lenzn), as vouraus hòt nèt tsechen. De vourtschbinn ist kemmen untermittelt van òlla en de Konferenz van minderhaitn avai ver òlla ist se bichte. Der dinst ist kemmen gem en de bèrk El Towers, der oa'zege as ist ver en Trentin.

Der numer van kanai - 75 ver ORF 1 ont 76 ver ORF Sport - ist kemmen gem van Minister van bèrkn ont van Made in Italy petn dekret van 9 van prochet.

Ibersetz gamòcht van Sprochtirl va de Tolgamo'schòft Hoa Valzegu' ont Bersntol

(cdt)